

Reglament da salarisaziun per la pleiv roman-catolica da Rueun-Ruschein-Siat-Pigniu

I. Determinaziuns generalas

Art. 1 Intent

Il present reglament da salarisaziun normescha l'indemnisaziun d'ufficials, funcziunaris e commembers da cumissiuns dalla pleiv, nun che prescripziuns specialas ni contracts specials stipuleschan enzatgei auter.

Art. 2 Dretg subsidiar

Aschinavon che quest reglament stipulescha nuot auter valan subsidiaramein la legislaziun da persunal e las prescripziuns dall'ordinaziun davart la salarisaziun dil persunal dil cantun Grischun (170.410).

Art. 3 Egalitad dallas schlatteinas

Las indicaziuns da persunas, funcziuns officialas ed indicaziuns professionali en quest reglament serefereschan sin omisduas schlatteinas.

Art. 4 Assicuranzas e cuosts socials

¹ Duront il temps da lavur per la pleiv ein ils ufficials e funcziunaris assicurai entras la pleiv encunter accidents e responsabladad.

² Da mintga indemnisaziun ad ina persuna privata vegn deducida sia cumpart allas assicuranzas dil provediment public (assicuranzas socialas per vegls, survivents ed invalids, prestaziuns supplementaras, dischoccupai, indemnisaziun per perdita da gudogn, maternitad) sco era dil provediment professional (assicuranza da pensiun ed accident), aschilunsch sco ei dat in'obligaziun da pagar contribuziuns.

³ La pleiv presta la cumpart sco patruna e renda quen allas cassas dallas assicuranzas socialas.

⁴ Subsidiaramein valan las prescripziuns dallas assicuranzas socialas.

Art. 5 Indemnisaziuns per sesidas e lavur extraordinaria

¹ Ils commembers da suprastanza vegnan salarisai annualmein cun ina indemnisaziun pauschala. Cunteniu en quella pauschala ein ils pensums dalla funcziun, sedutas e spesas ordinarias.

² Per lavurs extraordinarias che vegnan prestadas d'organs, funcziunaris e cumissiuns per la pleiv vegn per regla remunerada cun frs 25.00 per ura tenor il temps impundiu, nun ch'ellas ein indemnisadas cun ina pauschala ni dad autra vart. Parts dallas uras da lavur vegnan remuneradas en proporziun dil temps impundiu cun la salarisaziun per ura. Il viadi al plaz da lavur, respectivamein al liug da sesida ni uatga vegn quintaus sco temps da lavur sche quel sesanfla ordeifer igl intschess dalla pleiv.

³ Il plevon obtegn negina indemnisaziun supplementara sco commember da suprastanza. L'indemnisaziun per sia lavur ei cuntenida ella salarisaziun tenor contract da lavur.

Art. 6 Spesas

¹ Per viadis ordeifer igl intschess dalla pleiv:

- cun ils mieds publics vegnan ils cuosts effectivs da secunda classa indemnisai.
- cun auto privat vegnan indemnisai per km tenor la reglamentaziun cantunala mintgamai vertenta

² Per l'indemnisaziun da dunsena e loschament valan las prescripziuns cantunalas mintgamai vertentas.

³ Telefons, portos etc. vegnan indemnisai tenor cuosts effectivs ni tenor ina pauschala.

⁴ Spesas ein da far valer cun dar quen al cassier entochen ils 15 da december digl onn current.

II. Determinaziuns spezialas

Art. 7 Indemnisaziuns

¹ Ils commembers dalla suprastanza dalla pleiv obtegnan las suandontas indemnisaziuns pauschalas ad onn:

- | | |
|--------------------------------|--|
| - il president | frs. 3'000 |
| - il vicepresidente ed actuar | frs. 1'200 |
| - il cassier | frs. 1'500 / frs. 2'500 / frs. 5'000 (detagls alineas 4) |
| - igl administratur dils beins | frs. 1'800 |

² Il plevon obtegn negina indemnisaziun supplementara sco commember dalla suprastanza. L'indemnisaziun per sia lavur ei cuntenida ella salarisaziun tenor contract da lavur.

³ Quellas indemnisaziuns pauschalas ad onn valan per tutta lavur e per las sesidas da suprastanza e radunonzas generalas ordinarias che cumpetan ad els tenor constituziun ed uordens. Per sesidas, uatgas ed autra lavur extraordinaria obtegnan els ulteriuramein l'indemnisaziun tenor artechel 5.

^{4a} Tier l'indemnisaziun dil cassier cun frs. 1'500 visescha il cassier ils quens. Las lavurs da pagar ils quens, per far las pagas, tschentar quen, menar la contabilitad dalla pleiv ed il rendaquen annual vegnan en quei cass surdai ordeifer. Il cassier ei responsabels che la persuna che exequescha las lavurs survegn las informaziuns necessarias.

^{4b} Tier l'indemnisaziun dil cassier cun frs. 2'500 vegn la lavur per far las pagas, menar la contabilitad dalla pleiv ed il rendaquen annual surdada ordeifer. Il cassier tschenta quen e paga ils quens. Il cassier collaborescha cun la persuna che fa la contabilitad ed il rendaquen.

^{4c} Tier l'indemnisaziun dil cassier cun frs. 5'000 exequescha il cassier tut las lavurs sez (pagar ils quens, far las pagas, tschentar quen, menar la contabilitad dalla pleiv ed il rendaquen annual).

Art. 8 Plevon

¹ Per definir la paga dil plevon publichescha la baselgia cantunala dil Grischun mintg' onn ina gliesta cun las pagas officialas (onn da survetsch 1 – 20, e plevons cun ina vegliadetgna sur 65 onns). Quellas indicaziuns ein buca ligiontas denton valan quellas sco usit.

² Tier in pensum parzial ha il pensum da lavur da corrispunder cun la lavur efectiva ella pleiv e supplementarmein cun la situaziun finanziaria dalla pleiv.

Niev surpren la baselgia cantunala dil Grischun buca pli eventuals deficits dallas pleivs. Aschia sto la pleiv gia mirar pli lunsch el futur. Quei vul dir che la paga el scalem dil 20avel onn da survetsch (cun risguardar ils cuosts supplementars sco avs, cassa da pensiun eav.) sto esser supportabla per la pleiv el futur.

³ Tier in pensum parzial eisi necessari da fixar ordavon il carnet da duers (cun sclarir denter auter ils puncts da pastoraziun, messas eav.).

⁴ Il pensum da lavur dil plevon vegn fixaus entras la suprastonza dalla pleiv ed il vicari general ch'ei responsabels per il cantun Grischun.

Art. 9 Catechetas

Per definir la paga dallas catechetas publichescha la baselgia cantunala dil Grischun mintga onn ina gliesta cun las pagas officialas (scala 1 – 10 sin scalem primar e scalem superiur). Quellas indicaziuns ein buca ligiontas denton valan quellas sco usit.

Art. 10 Calusters

¹ L'indemnisaziun dils calusters sa vegnir fixada sco paga per ura tenor il temps da lavur ni cun pauschalas per survetsch (p.ex. messas dalla dumengia, messas da luvergis, firaus, nozzas, battens, sepulturas ed ulteriuras occasiuns).

² Las indemnisaziuns vegnan fixadas entras la suprastonza. Ils cuosts totals ein da tener en tenor il preventiv.

³ La suprastonza sa ellaborar in carnet da duers e surprendre tal el contract da lavur.

Art. 11 Organists

¹ Per definir la paga digl organist publichescha l'uniun d'organists e dirigents dil cantun Grischun ina gliesta cun ina proposta per las indemniziuns. Quellas indicaziuns ein buca ligiontas denton duessen las indemniziuns buca esser pli bassas che las indemniziuns sut igl 1 scalem « cun » respectivamein « senza » diplom d'organist.

² Ei sa era vegnir fatg giu ina pauschala per onn. Per saver far giu ina pauschala sto ei esser enconuscent contas messas che han liug cun accumpagnament dal'orgla.

³ Las indemniziuns vegnan fixadas entras la suprastonza. Ils cuosts totals ein da tener en tenor il preventiv.

Art. 12 Ulteriuras indemniziuns

¹ L'indemniziun sco per exempel per schubergiar la baselgia, schubergiar resti, decorar la baselgia eav. vegn fixada sco paga per ura.

² La suprastonza sa dar avon il temps che stat a disposiziun per schubergiar e decorar la baselgia per exempel cun l'indicaziun dad uras/per jamna, uras/meins ni cun ina pauschala.

³ Las indemniziuns vegnan fixadas entras la suprastonza. Ils cuosts totals ein da tener en tenor il preventiv.

⁴ La suprastonza sa luvrar ora in carnet da duers e surprendre tal el contract da lavur.

III. Determinaziuns finalas

Art. 13 Quen

¹ Per tutta lavur extraordinaria e per tuttas spensas ei da presentar in quen cun indicar cuortamein la lavur prestada.

² Il quen vegn controllaus e visaus dil president dalla pleiv.

Art. 14 Cass dispiteivels

En cass dispiteivels decida la cumissiun da gestiun davart l'indemniziun.

Art. 15 Midadas

La cumissiun da gestiun ha d'examinar periodicamein quest reglament e far propostas per midadas ed alzaments alla radunonza generala.

Art. 16 Vigur

Quest reglament va en vigur cun igl 1 da schaner 2017.


Art. 17 Approbaziun

Quest regulativ ei vegnius approbaus dalla radunonza generala constitutiva dalla pleiv ils 9 d'october 2016.

Per la suprastonza transitorica dalla pleiv roman-catolica da Rueun-Ruschein-Siat-Pigniu



Flurin Valaulta, president



Ursula Capaul, actuara